

Kaspers neues Haus

Wie de Chasper zume Huus chunnt

Von Hans von Holt

Adaption

Telefon: 078 915 9162
vonholthans@gmail.com

1. Auflage, 2021

© Hans von Holt

Adaption – alle Rechte vorbehalten.

vonholthans@gmail.com

INHALT

1. Akt - Strasse	4
1.1 Szene - Kasper / Grossi	4
2. Akt - Wald, im Hintergrund Hexenhaus mit Fenster	11
2.1 Szene - Kasper / Hexe / Zauberer / Grossi	11
2.2 Die Personen	27
2.3 Requisiten	27
8.1 Glossar	27

1. AKT - STRASSE

1.1 SZENE - KASPER / GROSSI

*Begrüssung der Kinder vor dem Vorhang.
(ev. Diskussion über ein eigenes Häuschen)*

KASPER

Sind ihr alli do? - Ja?
Sind au die da, wo nonig da sind? -
Ja?
Also guet, denn ähhhh....
ohhh...

Liebi Chinde, jetzt gsehn ich grad,
mir chönd gar nanig aafange!
S'Groosi isch ja gar nöd da!

Händ ihr s'Groosi neumed gseh? So?
Au nöd. Ich han sie überall gsuecht
und nienet gfunde. Hoffentlich isch
ere nüt passiert.

Ja, ohni Grooseli chönd mir das
Stuck gar nöd spiele. Wänd ihr mir
emal hälfe? Ja?

Also guet. Jetzt rüefed mir alli
mitenand am Grooseli. Uf drüü!
Eis... Zwei... Zweiehalb
Zweidrüüviertel ... und ... Drüüü!
Grooseli Grooseeeeliinii!....

★Kasper loost...

....Nüt isch.
Niemert git Antwort.
Jä so, ich bin dänn en Dumme! Sie
chas ja gar nöd ghööre, de Vorhang
isch ja na zue!
Dass sie's besser ghört, mached mer
grad emal de Vorhang uf!

Hau Ruck hau Ruck!
So - jetzt isch guet.

*(Sobald der Vorhang offen ist, wird er vom zweiten Spieler
wieder geschlossen)*

Was isch dänn da los? Jetzt muend en
halt namal uufmache.
Hooouu Ruck..... Hooouuu Ruck!

(Dieses Spiel nach Gutdünken verlängern)

Also wänn dä Vorhang namol zuegoht,
dänn gang ich ewäg, und Versteck
mich, grad wie s'Groosi.

Aber - das isch glaub au niet e so
guet. Ihr wettet doch es luschtigs
Chasperstück gseh, oder?

Ebe ja, ich han`s ja gwüsst. So,
jetzet isch dr Vorhang offe bliibe.
Gaht doch! Dänn mached mer halt
namal en Versuech. Aber es müend
alli hälfe.
Eis - Zwei - Drüü: Grooseli
Grooseli !

(Kommt ohne den Chasper zu bemerken)

GROSSI

He..he..he..! Wer heepet dänn da eso
gfüürchig? Es verjagt eim ja fascht
s'Trummelfäll! Händ ihr dänn gmeint
ich heig Schüblig i de Ohre?

KASPER

Muesch niet verschregge, Grooseli,
weisch ich han de Chinde gseit, sie
sölled luut rüefe.

(Sieht den Chasperli erst jetzt)

GROSSI

Jä so, Kasperli! Du bisch au da?
Ich han dich gar nöd gseh!

KASPER

Wüssed Chinde, s'Grooseli gseht halt
nümme eso guet. Es isch immer e chli
chränklich und hätt immer öppis
z'grochse. Es sitzt umenand und hät
e kei Appetit. Jaja, das arme
Groseli hät e kei Luscht meh - zu
nüütem.

GROSSI

Ja Chasperli, eso isch es. Drum bin
ich grad bim Dokter gsii. Und drum
häsch mich au nöd gfunde.

KASPER

Ähää, so isch das, dänn het ich no lang chöne rüefe.
Drum han ich dich nöd gfunde. Und, was hät de Pilletökti gmeint?

GROSSI

Er meint es, fähl a de gesunde, frische Luft.
Öb ich ächt nöd chönti furt zügler uus der Stadt, vielleicht in de Wald oder uf en Alp, wo's gueti, frischi Luft hebi. Deet chönt ich wieder gesund werde!

KASPER

Prima, dänn züglet mir beidi ebe in Wald und ässed all Tag frischi Luft!

GROSSI

Dumms Züüg! Häsch wieder nur Blödsinn im Chopf!
Vo de frische Luft hät mer doch nöd g'ässe!

KASPER

Wän **ich** Hunger han, so iss ich halt es grosses Butterbrot mit viel Honig druf, dezue en fette Savela und und en Vanille-Pudding.
Und du, Groseli, issisch die frischi Luft, das glii wieder gesund wiersch!

GROSSI

Ich mag ja gar nüt ässe, will ich nöd zwäg bin.

KASPER

Weisch was Groseli?
Du chunsch jetzt en ganz en chliiine Schnäggebrate über!

GROSSI

Pfui Chasper, das han ich dänn gar nöd gern!
Das würd mir grad de Mage cheere.

KASPER

Das wär no praktisch, dänn chönntet
mer en grad emal useputze, weisch,
mit eme Guttere-Putzer.

GROSSI

Äääh, du machsch meini wieder
Witzli!

KASPER

Oder, wänn'd nöd ässe magsch, dänn
trinksch halt. Weisch was?
Für Dich chaufed mer es Chüeli,
und dänn trinksch all Tag
chuehbrüehwarmi Geissemilch!

GROSSI

Aber Chasper, vo de Chüeh gits doch
kei Geissemilch! Usserdäm bin i doch
keis Chalb wo Milch trinkt! -
...Und wehe, du seisch mir Geis!

KASPER

Aber Grossi. Das würd ich doch nie
im Läbe...

GROSSI

Aber zerscht müend mer dänk es Huus
im Wald chaufe, suscht hämmer ja gar
kei gueti Luft, wo dr Pilletökti
verschriben hätt.

KASPER

Dänn wartet mer halt bis das es
Pflascherschtei rägnet und
Ziegelschtei haglet, und bauet das
Hüusli sälber

GROSSI

Du häsch meini wieder luuter
Lumpereie im Chopf! Ziegelstei sind
ja scho guet. Aber weisch, mir
bruuchet es Hüusli mit eme schöne
Gärtli devor.

KASPER

Und vor d'Türe schtelled mer es

schöööons Bänkli!

GROSSI

Ou ja, und wänn d'Sunne schiint
höckle'n ich druuf.

KASPER

Und ich hock uf em Zwätschgebaum und
iss de ganzi Tag Erdbeeri!

GROSSI

Aber Chasperli, uf em Zwätschgebaum
wachset doch e kei Erdbeeri!

KASPER

Das han ich au gar nöd behauptet.
Ich chauf doch d'Erdbeeri im Coop
und hocke demit uf de Zwätschgebaum
ufe!

GROSSI

Eh du mit diine ewige Dummheite.
Und überhaupt, uf de Zwätschgebaum
därfsch du gar nöd chlädere.
Ich hetti doch die ganz Ziit
Angscht, du chönntisch abe kheie!

Und dänn wärsch du schwär verletzt
und müesstisch ins Schpital, und ich
wär ganz ellei di heime.

fast magisch, voll in der Fantasie

Und uf eimal chömmt en Räuber und
ich müesst na e Räuber-Grossmuetter
werde! ...und dänn müesst ich....

KASPER

Uiuiuihhh!
Ja i dem Fall schtiig ich nöd uf de
Zwätschgebaum. -

schüttelt sich

Räuber-Grossmuetter!!!! Nei au!

Aber - duhu ... Groseli?!
Wänn mir doch wänd es Huus chaufe,
bruuched mir doch en Huufe Gäld!
Und so viel hämmer doch nöd.

GROSSI

Los, min liebe Chasperli, es Hüsli
wo **mir zwei** bruuchet, choscht **nöd**
alli Wält.
Und übrigens: Ich han scho Gäld!

KASPER

Was? - Du häsch Gäld?

GROSSI

Sicher. Was meinsch dänn du? Ich han
miner Läbtig viel gschaffet, und han
immer e chli glueget mit em Gäld. Ja
- und jetzt hani halt e chli öpis
gschpart! Wart nur, ich hol emal
alles, won ich uf de Siite han.

(Grossi geht ab...)

KASPER

Nei eso öpis! Ich han dänn es tolls
Groseli. Jetzt hätt doch die es Läbe
lang g'schpart und hätt immer guet
g'glueget. Defür chömmer jetzt es
Hüsli chaufe! Judihuii!
Jetzt gahn ich in Wald und luege,
wo's es Huus git zum chaufe. Es
Schöns und es Grosses!
Eis mit 12 Zimmer.
Meined ihr das langi, 12 Zimmer?
Oder isch es ächt e chli z'viel?
Ich will emal überlegge, wieviel
Zimmer das mir bruuched:

Also - emal es Tschuutizimmer,
es Schnabulier-Zimmer,
es Gaggo-Zimmer,
es Groseli-Zimmer,
es Chasperli-Zimmer,
es Z'Morge-Zimmer,
es z'Mittag-Zimmer,
es z`Abig-Zimmer,
es z'Zmitzt i de Nacht-Zimmer,
es Schnarchli-Zimmer,
es Wäsch-Zimmer,
es Zähputz-Zimmer!!
Momoll, es bruucht 12 Zimmer!

Aha, was meined ihr? Es tägig au de
Helfti? Ja - eigentlich ...,

schtimmt, ihr händ rächt, suscht
mues s'Groseli eso viel putze und
schartabsuuge - Uiuuihh....

GROSSI

(Kommt mit dem Geldsack)

Da lueg Chasper, da sind die viele
Sparbatze. Heb Sorg derzue, und lahn
ders nöd ewägnäh!

KASPER

(Nimmt den Sack)

Uiuui, isch dä schwer! Da häsch
aber lang müesse schaffe, bis du das
Gäld binenand gha häsch. -
Guet, dänn gahn ich jetzt.
Uf wiederluege Groseli!

GROSSI

Tschau Chasperli! Gäll hebsch am
Gäld sorg! Weisch, wämmer's nümme,
hettet, müesstet mir diräkt
verhungere!

KASPER

Das wär aber gar nöd glatt! Wänn ich
verhungeret bin, chan i doch nüt meh
ässe, und das währ min Tod, und das
würd ich nöd uushalte!
Also, läb wohl Groseli, uf
Wiedergüx!

(geht ab)

GROSSI

Läb wohl Chasper! Gälled Chinde, ich
han denn ganz en tolle Chasper?
Losed, wänd ihr mir en Gfalle
tue'?... Ja?... Fein.
Tüend doch es bitzeli uf en
uufpasse, und tüend em hälfe, wänn
öppis sötti chrumm laufe.
Ich danke eui vielmal, und adieu
underdesse!

geht ab - Vorhang

2. AKT - WALD, IM HINTERGRUND HEXENHAUS MIT FENSTER

2.1 SZENE - KASPER / HEXE / ZAUBERER / GROSSI

Vorhang auf - Hexe kommt

HEXE

Ich bi die alt Häx Abraxa.
Ich bin esooo alt, schteialt,
das es scho bald nüme wahr isch.

ekelt sich

Ich chan **d'Mänsche** nöd schmöcke!
Niemert chani verbutze, niemert!
Aber s'Gäld... - das hani gern,
d'Chöle, de Chlütter, de Chiies!
Ich wett ich chönnt alli Schtei uf
dere Wält verzaubere - zu luuter
Gäld! Aber das chani ebe grad nöd!
Ich kha numme häxe und niet zaubere.

pathetisch

Ja, ja, s'Gäld, s'Gäld -
isch na schöner als d'Wält...

schnuppert zur Seite, von der Kasper kommt

Es chunnt öpper dur de Wald!
Mhm, ich schmöckes scho. Ich han
halt e fiini Nase und e gueti
Schmöcki. Und - s'Gäld schmöck ich
bsunders gern! Da schtinkt's ja
diräkt nach Gäld!
Ja, ja! Es Gäld stinkt ebe doch!
Aber viel bässer als Menschefleisch!
Bim Fliegepilz!

schnuppert

KASPER

(Man hört ihn von weither singen - Tri tra trullala)

HEXE

Ich gsehn es flotts Bürschtli cho.
Isch das nöd de Chasper? Er treit en
Sack. En groosse Sack! Isch da ächt
am änd Gäld drinn? Das wär dänn
schön, wänn de Chasper zu mir chänti
mit dem Chlütter!
Hihihil, wott er mer's ächt schänke?

So, ihr meined nöd?
Aber das Gäld mues ich haa!
Wart nur Pürschtli, ich versteck
mich,
dass du mich nöd grad gsehsch!

(Hexe kichernd ab)

KASPER

*(kommt singend aus dem Wald.
Wird durch Kindergeschrei unterbrochen)*

Was säged ihr? ...
E Häx isch da gsii? Die wott mir
s'Gäld ewäg näh?
Die isch meini nöd ganz bi Troscht.
Mis Grooseli schaffed jetzt allwäg
und schpared e dewäg, numme dass es
die blöd Häx eifacht chan ewägnäh?

Neineinei! Chunnt garnöd in Frag -
de Sack volle Gäld tuen ich jetzt
verschtecke.

(Geht mit dem Sack weg und kommt ohne zurück)

So Chinde, dä Gäldsack hani
versteckt, wüssed er imene hohle
Baum inne. Det findt en niemert.
Gälled, ihr säged nüüt!
Ihr därfed eui ja nöd vertschnäpfe
.... also guet.
Dänn ruef ich jetzt dere Häx.

Die wott ich nämlich emal gseh,
wo am Chasperli wott Gäld schtähle!

Chömmet, mer rüefed all mitenand,
dänn ghört sie's ganz sicher:
Häxli... Abraxa... alte Bäse...
Häxeschrubber... usw.

HEXE

Was isch au da für e Brüellerei?
Ich bi ja scho da!

schleimig

Nei lueg au da, isch das en schöne
junge Maa!

KASPER

kichert in sich hinein

Und du bisch e schööni jungi
Spinatwachtle
- ähh, Frau!

HEXE

Danke für s'Komplimänt!

KASPER

Die hätt en Ibildig, die! E sonen
alte Drache!

HEXE

Ha`s scho g`hört!
Ich bin kein alte Drache!

KASPER

So, nöd?
Machsches aber es Gfräss
wie`n en rässe Chääs!

grinst, zu sich

Hä, das reimt sich so guet!

HEXE

Wart nur, das muesch du mer büesse!

scheinheilig...

Säged emal, gahsch e chli go spaziere
im Wald?

KASPER

Natütterli Frau Gütterli,
ich gang go fische uf dä Bäum!
Was suscht?!

HEXE

De schön Herr macht wohl es
Gschpässli...

KASPER

Gschpass mues sii,
seit d'Muus und biist de Chatz in de
Schwanz.
Aber säged emal, wem ghört denn das
Hüsli deet?

HEXE

Das? Das isch mis Huus,
mis Hüüsli, mis Paradiesli!

KASPER

Das tät mer eigentlich gfalle.
Verchaufed er's?

HEXE

Verchaufe? - Vielleicht... aber es
choschtet Gäld, viiiiiiiil Gäld!

KASPER

Häsch öppe gmeint ich heig e keis?

HEXE

Sicher nöd eso viel, wie'n ich
bruuche für mis Hüüsli!

KASPER

Du chasch ja gar nöd wüsse, wieviel
Gäld das ich han! En ganze Sack voll
hani! Jawohl! Luuter Spaarbatze vom
Grooseli!

HEXE

Hahaha, das chasch am Fährimaa
verzelle, aber nöd mir! Vom spare
isch no niemands riich worde.
Niemand!

KASPER

Glaubsch es öppe nöd? Ich lüge dänn
nöd, das hanni nöd nötig.

Gälled Chinde, ihr händs gseh, ich
han en ganze Sack voll Gäld!

HEXE

Das chönd ihr mir nöd aagäh, das
isch en Schwindel! De Chasperli und
Gäld! Biim Fliegepilz!

KASPER

Du muesch gar nöd eso blöd schwätze!
Wart nur, ich zeig dir dä Sack grad
emal.

(Kasper holt den Sack)

HEXE

Hähähä, das han i jetz gschickt
iigfädlet! Jetzt bringt mer das
Pürschtli s'Gäld no sälber!

KASPER

(Kommt mit dem Sack)

Da lueg nur mit diine Bölle-Auge
und schtier e kei Löcher i di gueti
Luft!

HEXE

(Lacht schallend)

Da muess ja dä Häxebäse lache! Biim
Fliegepilz! Dä Sack da söll voller
Gäld sii? Da hätt's doch nume
Kaschtüttere drin!

KASPER

Kaschtüttere? Du häsch, meini en
Egge'n ab!
Dir fählt sicher en Ziegel im obere
Schtübli vo dim verschrumpflete'n
Öpfel!
Dä Sack isch voller Gäld, vo
z'oberscht bis z'underscht, vo hinde
bis vorne, vo links bis rächts!
Da, griif emal

(Will den Sack an sich reißen. Kurzes Handgemenge)

KASPER

Häsch gmeint, du alte Bäse!
Neinei, da muesch scho e chli
frühner uufschtah!

(Kasper ab mit dem Sack)

HEXE

Söikärli! Wart nur, das Geld
vertwütsch ich scho na!
Ahhh, wie guet das stinkt!

(Kasper kommt wieder ohne Sack)

KASPER

Gäll häsch di gschnitte, du grupfti
Gans! Häsch mer welle de Sack
chlaue! Niet mit em Chasper!

HEXE

Das isch ja gar nöd wahr. Ich han dä
Sack nume welle ähhhm - guet
versorge...

KASPER

Weisch e kei füülere Uusred?
Settig wie Dich känn ich scho lang!
Aber säg jetzt, hät's i dem Huus en
Salon?
Oder e gueti Schtube?

HEXE

Blödi Frag, natürlü hät's e Schtube
im Huus.

KASPER

Und e Schpiis-Chammere?

HEXE

Sicher. E schööni, grossi
Schpiis-Chammere.

KASPER

Und, hät's öppis drinn, i dere
Schpiis-Chammere?

HEXE

Natürlü, en ganze Huufe feini Sache:
Würscht, Eier, Schlagrahm, Schoggi,
Vanillepudding, Iis crème

KASPER

Was, Vanillepudding und Iis crème?
Mhmm...
fein, das wott ich aber z'erscht
gseeh!

HEXE

Das chasch du scho. Lueg nume dur
s'Fänschter ine, da chasch alles
gseh!

(Kasper geht an's Fenster und schaut hinein)

(Hexe schleicht sich zum Sack und will ihn entwenden)

KASPER

Da ine isch es ja scheckdunkel, mer
gsehtja gar nüt.

(Sieht die Hexe und entreißt ihr den Sack wieder)

HEXE

Du bisch dänn en fräche Kärli, en
alti, hilflosi Frau e derewäg
z'vermöblel!

KASPER

Bruuchsich gar nöd eso blöd tue, die
Chinde da unne wüsted scho, wer vo
euis zwei de Fräch isch,
gälled Chinde!

HEXE

Nei, ihr dumme Goofe, de Chasper!
Nöd ich!

KASPER

Neinei, die Chinde sind nöd dumm,
die sind sogar gschiider als Du!
Aber jetzt zeigsch mer das Huus, vo
z'underscht bis z'oberscht.
Ich luegs jetzt zerscht aa, und
wänn's mer gfallt, dänn chauf ich's,
und dänn chunsch s'Gäld über.Erscht
dänn, häsch verschande!?

HEXE

Das Huus wird der dänk scho gfalle,
für säb hani e kei Chummer.

mit Hexengekicher

Aber säg emal Chasper, wotsch
eigentlich hürate, dass du es **Huus**
wotsch chaufe?

KASPER

Eigentlich gaht's dich gar nüt aa!
Aber ich wett für mis Grosi es
Hüusli chaufe.Und es mues ebe im
Wald si, wäge de frische Luft,
will's de Dokter verschriebe hät!

HEXE

Soso, de Dokter hät's verschriebe
.....
jaja, frischi Luft hät's da usse im
Wald scho,
aber die choscht na meh weder
s'Huus!

KASPER

Du bisch dänn en hinterhältigi
Gumsle, wottscht mir sogar na d'Luft
verchaufe!
Aber Schluss jetzt mit dem blöde
Gschwafel,
zeig mer s'Huus!

HEXE

Zerscht wott ich aber s'Gäld haa!

KASPER

Das tät der eso passe, du alte
Schreck-Schrubber.
Ich chauf doch nöd e Chatz im Sack!

HEXE

Also, mini Chatz chunsch du nöd
über! Die bliibt bi mir! E Häx ohni
Chatz! Chasch danke!!!

KASPER

Dänn lasch es halt sii, jetzt hani
gnueg. Ich haues und sueche mir für
mis gueti Gäld es anders Huus, woni
nöd muess mit em alte Schrubber über
Chatze schnurre, und wo d'Luft
gratis isch.

(Kasper will gehen)

HEXE

geldgierig

Nei neiii, blib da, ich zeig der das
Huus ja scho,
vom Chäller bis zu de Winde.

KASPER

Guet, gang voruus, ich chume dänn
hindedrii.

HEXE

Ja dänn gahn ich efangs voruus, e
chli go Ordnic mache bis d'chunnsch!

(Hexe ab)

KASPER

Was die au die ganz Ziit zämme
schnäderet.
De Sack gahn ich jetzt wieder go
verstecke,
gschiider isch besser.

(Kasper ab mit Sack. Kommt sofort zurück)

Und jetzt gahn ich go luege, öb mich
die Zahluggefliegepilzbabe nöd
agschwindlet hät.

(Kasper ab in's Haus)

ZAUBERER

(Zauberer erscheint mit Geheul)

Huiiii.. Pfuiiii...Bi allne Rattze und
Kröteschwänz, das isch doch bimeid
de Chasper gsii! Ich han en scho
kännt a sinere Stupsnase und a
sinere Zipfelchappe.
Es isch grad rächt das ich das
Pürschtli treffe,
jetzt wird abgrächnet.
Wänn er umechunnt, so tuen en
verzaubere, verhaue, verprügle und
ihn zur Schecke mache!
De Chasper hätt mich nämlich grad
letschi versäcklet, und das laht
sich en Zauberer Kadabranix nöd
gfalle! Ich hole jetzt dä groosse
Verschwundibus-Sack. Gwundrig wie de
Chasper isch, schteckt er dänn sini
Rüebe i de Sack ine...

kichert

Und wer emal siin Chopf i de
Zaubersack ine hebet, dä bringt en
nümme use! Ich muess dänn nume de
Sack zuebinde und en mitnäh.
Huiiii ... Pfuiiii ... Kröteschwanz!

(Zauberer geht ab)

HEXE

Em Chasper gfallt mis Hüusli! Er hät
nume eso gschtunet, won er alles
gseh hät.
Aber am beschte gfallt's em i de
Schpis-Chammere.
Er hätt grad agfange schnabuliere
und ich han gseit er söll sich nur
Ziit näh,

kichert in sich hinein

und underdesse hol ich mir de Sack
voll Gäld! - Wo hät er en ächt
verschteckt?
Wänd ihr mir das nöd säge?
Moll, das Gäld ghört mir, er hät mir
dänk das Huus abkauft, und jetzt
wott ich das Gäld! -

So ihr wänd mir's nöd säge? Sälber
gschuld!
Bim Fliegepilz!
Dänn gahn ich jetzt in Wald goge
Giftchrütli sammle, und dänn mach
ich am Chasper es feins
Giftchrüterteeli, und wänn er devo
trunke hät,
denn weiss er überhaupt nüt meh und
git mir s'Gäld! Hihihhi

ZAUBERER

Nei lueg au da, d'Häx Abraxa.
Grüezi, Grüezi.

HEXE

Jeeeh...bin ich jetzt verschrocke ab
eui!

ZAUBERER

Händ er öppe es schlächt Gwüsse?

HEXE

Ja, chönd danke, das han ich nie.
E Häx und es schlächts Gwüsse!

lacht laut - dann böse

Aber was händ ihr da z'sueche?

ZAUBERER

Scheinheilig

Ich?

Ich spaziere nur e chli umenand

HEXE

Uusgrächnet vor minem Hüusli?
Hauets in Chübel,
ihr chönd amene andere Ort go
umeschliche.

ZAUBERER

unbeirrt

Ich warte da uf de Chasper.

HEXE

Uf de Chasper? Jää, isch dänn dä i
de Näächi?

ZAUBERER

Tüend doch nöd eso schiiheilig!
Er isch doch i euiem Huus!

HEXE

hinterhältig

I mim Huus? Das wär mir neu!
Da weiß ich nüt dervo!

ZAUBERER

So, nöd?
Dänn will ich grad emal go luege!

HEXE

I mis Huus chunnt e kein Zauberer!
Biiim Fliegepilz! Ämel nöd esonen
Galgevogel wien ihr eine sind!
Ewägg, gönd vo mim Huus ewägg!

ZAUBERER

Ihr bruched gar nöd eso uf euis
Zauberer z'schpeuze, suscht duen ich
dir diin Häxebäse in en chliine
flumige Staubwedel verwandle!
Hihihih!

Schleimig

Säged, isch de Chasper **morn** au no da?

HEXE

Sicher, sicher, er bliibt einewäg bis übermorn.

ZAUBERER

zu sich

Hä! Alti Faltegans! Da hesch die schön verschnäpft!

zur Hexe

Ah guet, dänn chumm ich halt übermorn namal verbii!

(Zauberer ab) nicht abziehen!

HEXE

Bin ich froh, das dä Dummchopf wieder furt isch. Dä hät's doch nume uf das Gäld vom Chasper abgseh, das gschpüür ich ganz genau! Aber das Gäld chum **ich** über, ich ellei! So und jetzt gang ich die giftige Spinnechrütli go hole! Bim Fliegepilz! Genau dört!

(Hexe ab - Zauberer kommt mit Zaubersack)

ZAUBERER

Die dumm Chue vonere Häx meint allwäg,
ich chämi übermorn wieder!
Hätt niet emol gmerkt, wie die sich verschnäpft hätt!
Da hani de Zaubersack und wänn de Chasper chunnt

(Zauberer legt Sack auf die Spielleiste)

... ou du verbrännti Zaine, jetzt hani na d'Schnuer vergässe, jetzt chan ich nöd emal de Sack zuebinde! Fliegedräck und Kröteschliim! Jetzt mueni namal dä wiiti Wäg zrugg, nur um die Schnuer z`go hole!

(Zauberer ab, Kaspar tritt auf)

KASPER

Jetzt hani aber alles ghöört! So en Sack isch das also! Mir chunnt e gueti Idee. D'Häx wott doch Geld ha. Jetzt tuen ich e chli Münz i dä Zaubersack ine...

(holt Münz aus dem Sack)

...und wänn dänn d'Häx chunnt, denn schmöckt sie das Gäld und hebt ihren verschrumpfleten Öpfel in Sack ine, und dänn bringt's en nümme use! Isch doch e gueti Idee vo mir, oder?

Und wänn dänn de Zauberer chunnt, so chan er die Häx grad mitnäh! Wird dä e Freud ha!

(Kasper ab)

HEXE

(Kommt mit Kraut)

Sodeli, jetzt hani die Giftchrütli! Jeh, was liit dänn da für en Sack?

Da hät's doch öppis drin? Biim Fliegepilz?! Ich schmöck es scho, ich schmöck das Gäld! Das muess de Gäldsack vom Chasper sii?

gierig

Gäld! Ahhh! Ich schmöcke Gäld! Das Gäld muen ich haa!

(Steckt den Kopf in den Sack) (>>> Grosi anziehen)

KASPER

(Kommt und schiebt die Hexe ganz in den Sack und verschwindet wieder)

ZAUBERER

So jetzt hani d'Schnuer. - Was gsehn ich dänn da? Da isch ja scho öpper im Sack! Das isch sicher de Chasper, de gwundrig Hagel.

Wer hät en ächt in Sack inetaa? Ächt d'Häx?

Jaja, das isch sicher d'Häx gsii.
Prima! Da muess ich ja gar nüt meh mache. Ich nime jetzt dä Sack mit, und de Häx bring ich dänn na en Blumeschtruuss uus rotem Fingerhut! Dä isch bsunders giftig... Hahaha...

lacht schadenfroh

(Mit dem Sack ab)

KASPER

(Mit Geldsack)

Händ ihr das gseh? Ouiouioui, jetzt hani aber Schwein gha, es riiise Schwein, wett fascht säge e ganzi Säue-Famili! So schlächt händ's die zwei mir welle mache, und jetzt sind grad beidi inegheit!

überlegt

D'Häx isch doch jetzt bim Zauberer, oder? Und dä laht die alti Schrupfgumsle sicher niemeh uusem Sack. Also, wänn niemert meh da wohnt, so ghört das Hüüsli jetzet mir!

Ich nime jetzt dä Gäldsack und rüer en - nei, nöd zum Fänschter **us**, sondern zum Fänschter **ii**!

(Wirft den Sack in's Haus)

GROSSI

(Kommt ohne das Haus zu sehen)

Was isch dänn da los?

KASPER:

Groseli, ich han es Huus!

GROSSI

Wo dänn?

KASPER

Muesch dich halt umchere_

GROSSI

Nei aber au, nei au! Isch jetzt das
es herzigs Hüusli! Und e Chatz hätts
au! Sooo härzig! Das hät sicher viel
Gäld koschtet!

KASPER

Chinde, säged emal am Grosi
was das Huus koschtet hät!

(Kinder rufen)

GROSSI

Was säged ihr da?
Nüt! Nur e paar Rappe?

KASPER

Stimmt uf de Tupfe genau, fascht nüt
hät's koscht!

GROSSI

Das isch jetzt aber emal billig! Das
es das hüt no git?

KASPER

Jetzt wirsch Du wieder ganz gsund,
Grooseli,
und erscht na jünger. Eso jung,
dass Du wieder tanze chasch!

GROSSI

Neiaberaunei, Chasperli ich chan
doch nüme tanze,
es wird mer ja ganz trümmelig, wenn i
nume dra denk!

KASPER

Neinei, Dir wird's nöd trümmelig.
Mir tanzed gaaanz langsam!
En Altwiibertanz!

Chum Grosi:
Tritratrullalla_..tritratrullalla...

(sie tanzen ein wenig)

GROSSI

So Chasper es isch gnueg, hör uf,
es wird mer ganz schturm.

Ich gang lieber i die neuu Chuchi
und mach euis en feine Kaffi, und
dänn fiired mer e chli!

KASPER

Niet nume e chli, jetzt fiired mer
de
Neui-Wald-Frisch-Luft-Bank-vor-em-Hü
üsli-Tag

Judihuii!

GROSSI

Tschau Chinde, und danke vielmal das
ihr uf de Chasper uufpasst händ!

KASPER

Tschüüss zämme, und namal viele Dank
für euri grossi Hilf.

Uf Wiedergüx!

Vorhang zu

2.2 DIE PERSONEN

KASPER

S' GROOSI

HÄX ABRAXA

ZAUBERER KADABRANIX

2.3 REQUISITEN

3. Zaubersack
4. Schnuer
5. Chrüütli
6. En Sack voll Gäld
- 7.
- 8.

8.1 GLOSSAR

Pilletökti.....	Arzt
roter Fingerhut.....	hochgiftige Pflanze
grochsen.....	jammern, stöhnen
Chöle, Chlütter, Chiis	Geld
Schmöcki.....	Nase
Gfräss.....	Gesicht
Bölle.....	Zwiebeln
Kaschtütterere.....	Kastanien
Gumsle, Gluggere.....	verachtendes Schimpfwort
schnabulieren.....	essen